



Sesida dals

24 d'avust 2020

Communitgà ils

31 d'avust 2020

Protocol nr.

682

Incumbensa Cavegn

concernent il pachet da mesiras per mitigiar las consequenzas dal coronavirus en il sector da las medias grischunas

Resposta da la Regenza

Da princip tutgan las medias tar quels secturs, en ils quals il stadi intervegn mo en moda fitg retegnida. Quai per dus motivs: Per l'ina per betg influenzar l'opiniun publica en moda dirigistica (libertad d'opiniun e libertad da pressa), per l'autra per betg effectuar ina distorsiun da concurrenza (aspect da l'economia da martgà). Fin ussa èn las mesiras regulatoricas da vart dal maun public pia er sa restrenschidas al metter a disposiziun ina purschida da basa (SDA/ATS, SRG SSR) sco er a tscherts instruments da promoziun (promoziun da la pressa en furma da taxas reducidas per consegnar gasettas e revistas, mesiras per mantegnair e per promover las linguas minoritaras). Quests mecanissem da direcziun tradiziunals èn regulads legalmain per gronda part sin plaun federal. Sin plaun chantunal sa restrenscha l'engaschament dal maun public fin ussa – analogamain ed en cumplettaziun da la Confederaziun – sin mesiras da promoziun a favur da las duas linguas minoritaras rumantsch e talian.

Ina dimensiun supplementara ed absolutamain nova han dumondas da la politica da medias ussa però survegnì dapi la midada dal millenni: la midada cumplexsiva da las medias è in dals megatrends globals actuals e furma er per la Svizra e per il Grischun ina situaziun da partenza cumplettamain nova che na po betg vegnir dumagnada cun las metodos da promoziun tradiziunalas. La midada en il cumportament medial maina a novas furmas d'utilisaziun ch'èn savens indifferentas envers spazis e process politics etablids ed envers reglas da communicaziun etablidas. Concretamain è il maun public en privel da perder standards ch'èn avant maun e ch'èn sa cumprovads e quai en dus regards, numnadamain en furma da deficits democratic-politics pussaivels e sco smanatscha da la multifariadad en ils pitschens spazis.

Sut quest aspect ha la Regenza incumbensà il Cussegl grond il matg 2018 d'acceptar la «Incumbensa Atanes concernent l'avegnir da las infurmaziuns en il Grischun».

Quella prevesa da laschar giuditgar en in rapport las perspectivas finanzialas a media fin a lunga vista da tut las medias che cumparan en tut las linguas chantunalas sco er da mussar variantas per in sustegn (finanzial u d'auter gener) a favur da las medias en il chantun, per che quellas possian ademplir er en il futur lur funcziun impurtanta per la democrazia.

La Regenza è conscienta che la crisa da corona ha anc pegiurà la situaziun per las medias resp. ha anc accelerà ils svilups menziunads qua survart. Mesiras supplementaras a curta vista da vart dal chantun per las medias – che surpassan las mesiras COVID-19 immediatas da la Confederaziun – resguarda la Regenza però sco betg cunvegnentas: quellas gidassan mo per in temp curt e limità; ultra da quai stuess l'emprim vegnir stgaffida la basa legala correspudenta. Anzi, las explicaziuns fatgas qua survart mussan che las midadas structuralas en il sector da las medias ston vegnir discutadas en il rom d'ina preschentaziun generala e d'ina planisaziun a media fin a lunga vista – gist er en vista a la gronda impurtanza democratic-politica da la rapportaziun tras las medias.

Sin basa da l'incumbensa Atanes ha il Departament d'educaziun, cultura e protecziun da l'ambient (DECA) incumbensà l'Universitad da Son Gagl (HSG) e la Scola auta spezialisada dal Grischun (SASGR) da far in studi cun il titel «Die Medien im Kanton Graubünden: Bestandesanalyse und Zukunftsperspektiven». En il rom da l'elavuraziun èn er planisads discurs cun represchentanzas da tut las interpresas da medias en il chantun Grischun. Il rapport duai esser avant maun vers la fin da l'onn 2020. El duai er mussar pussaivladads da promover las medias da vart dal maun public. Eventualas mesiras chantunalas duain vegnir prendidas en moda subsidiara al pachet da mesiras federal a favur da las medias, che vegn tractà l'atun dal Cussegl naziunal.

Sa basond sin questas explicaziuns propona la Regenza al Cussegl grond da refusar questa incumbensa.



En num da la Regenza

Il president:

Dr. Chr. Rathgeb

Il chancelier:

Daniel Spadin